

# INUIT ATAQATIGIIT

## Inatsisartuni



Aasiaat 05. juli 2017

Inatsisartut suleriaasianni § 37, imm. 1 naapertorlugu matumuuna Naalackersuisunut imaatumik apeqquteqaateqarpunga.

### Apeqqutit:

1. Nukissiorfiit Qaasuitsup Kommuneata nunaqarfiini containerinut ilisinissaminnut nunaminertanik qinnuteqarnikuunerpa? Akissut naamiuppat: Qinnuteqarnissamut pilersaaruteqarpat?
  - a. Containerimik 20 fod-itut angitigisumik ataatsimik qerititsiviliinissamut atugassamik.
  - b. Containerinik 20 fod-tut angitigisunik marlunnik qerititsiviliinissamut atugassamik.
  - c. Containerimik 40 fod-tut angitigisumik ataatsimik qerititsiviliinissamut atugassamik.
  - d. Containerinik 40 fod-tut angitigisunik marlunnik qerititsiviliinissamut atugassamik.
2. Qaasuitsup Kommuneata nunaqarfiini sorlarni nukissiorfiit nukissamik naammattumik pilersitsisinnaappat aamma sorlarni nukimmik naammattumik pilersitsisinnaanngillat:
  - a. Containerimik 20 fod-itut angitigisumik ataatsimik qerititsiviliisoqassagaluarpap?
  - b. Containerinik 20 fod-tut angitigisunik marlunnik qerititsiviliisoqassagaluarpap?
  - c. Containerimik 40 fod-itut angitigisumik ataatsimik qerititsiviliisoqassagaluarpap?
  - d. Containerinik 40 fod-tut angitigisunik marlunnik qerititsiviliisoqassagaluarpap?
3. Qaasuitsup Kommuneata nunaqarfiinni 20 fod-tut aamma 40 fod-tut angitigisunik containerinik marlunnik qerititsiviliinissamut nukissiorfiit nukissamik naammattumik pigisaqanngitsut naammattumik nukimmik pilersitsisinnaalersinneqassappata taava tamanna qanoq naleqassava? Nukimmik pilersitsisinnaanerata annertusarneqassappat tamanna nunaqarfiinni ataasiakkaani qanoq naleqassava?

(Inatsisartuni ilaasortat Peter Olsen, Inuit Ataqatigiit)

### Tunggavilersuut:

Ukiuni kingullerni marlunni pingasuni nunatsinni saarullippassualeqalersimavoq. Saarullit qangatut takkusimaalersimapput. Saarullinnik tunisassioq aatsaat taama annertugileqqisimavoq soorlu taamani qangaanerusoq 70-kkunnit 80-kkunitullu.

Saarullinniarnerinnaanngikkaluartoq aammali qalerallinniarneq ingerlalluaruluttortoq aamma nalunngilarput.

Naatumik oqatigalugu aalisarneq ukiuni kingullerni marlunni pingasuni aatsaat taama ingerlalluartigilersimavoq.

Taamaakkaluartoq tusarsaajualersimavoq tunitsivissaaleqineq sumi tamaani sinerissuatsinni. Tunitsivinni assigiinngitsuni peqqumaasiveqannginneq tigooraaveqannginnerlu pissutaalluni ullormut aalisartut tunisinnaasaat killilersorneqarput, aalisartut nuannarinngilluinnagaannik. Tunitsivissaqarneq toqqorsivissaqarnerluunniit annertunerugaluarpap aalisartut aningaasarsiornerat suli pitsaanerujussuusinnaagaluarpap. Aalisartuunnaangitsoq nunatsinnut tamanut aningaasarsiornerat pitsaanerujussuusinnaagaluarpap tunitsiveqarnikkut pitsaanerumik inisimasoqartuuppat.

Aalisartut sumi tamaani suaartarput "umiarsuarnik tunitsiviusinnaasunik umiarsuaaliisoqarli"

Umiarsuarnik tunitsiviusinnaasunik umiarsuliisinnaaneq ajunngilaq ajornartorsiutaasumullu aaqqiissutaagallarsinnaasoq qularinngilluinnarpara. Kisianni uanga isumaqarpunga tamanna ataavartumik aaqqiinerungitsoq.

Uanga isumaqarpunga nunaqarfippassuatsinni aalisarfiulluartunilu aalisakkanik tunisassiassanik tigooraasinnaasunik toqqorsiviusinnaasunillu amigaateqartoqartoq.

Uangalu isumaqarpunga tigooraavittut toqqorsivittullu atorluarneqarsinnaasut tassaasut containerit qerititsiviit qerinasuartitsivittallit.

Nunaqarfinni qerititsiveqarnerup tungaatigut annertusaanitsigut isumaqarpunga aningaasarsiornikkut assakaasup kaavilluarnerusinnaanera aqutissiunneqarsinnaasoq, asuli ukiumiit ukiumut umiarsuliinnartarnerminngaaniit.

Aalisakkat takkuttarlutillu qaanngiuteqqittartut nalunngilarput. Taamaattumik isumaqarpunga siunissaq ungasinnerusoq eqqarsaatigalugu nunaqarfinni periarfissagissaarfiusuni tigooraaveqarnikkut toqqorsiveqarnikkullu pitsaangorsaaniissaq – ineriartortitsinissaq isumatusaarnerusoq. Isumaqarpungalu qerititsivilersuineq pitsaasuusoq isumatusaarnerusorlu.

Taamaaliortoqassappallu taava nunaqarfinni innaallagissiuteqarnerup tungaatigut periarfissat pitsaangorsarneqartariaqarput. Nunaqarfinni nukissiuteqarnerup tungaatigut ineriartortitseqqinissaq allaqqunneqarsinnaanngilaq inuussutissarsiornerup tungaatigut ataavarnerusumik ineriartortitsisoqaqqissappat.

Taamatut tunngavilersuuteqarlunga apeqquteqaatiga ingerlateqqippara.

Qinnutigissavara apeqqutigisakka ullut suliffeqarfiusut 10-t iluanni akileqarumaartut.